

後知天之報施仁孝固不爽矣後封爲徵時太史兼寰中極濟使鍾姑爲易隱淨貞夫人

贊曰徐慧通者仁孝神仙也館穀養母借醫尋父若博學多能以成其爲人者然惜其遠尋亡父而不能轉見生母又何留此缺恨也人子至此故惟有出家訪道冀我族之同昇也然使無仙才以成仙史之功亦幾幾乎其難哉

沈線陽小傳

沈線陽者萬山長女也聲宏體碩無女子相生三歲而失去莫知所之方萬山之徒雲南也吾往會於滇上同煉天元大藥至期年而始成日者線陽來見已隔三十餘年父女相逢兩不相識細詢之始知其爲長女也自小離親幾成永訣然在髫稚亦不自知其別麻闡之際卽遇薛真陽古稱中條玄女者是也名之爲玉霞號之以線陽命掌神劍兼守玉匣諸祕法得授靈通大道吾與萬山正煉天元爰此來滇共服成藥皆真陽教之也萬山大喜卽出成丹與全家服之皆沖舉焉線陽願大慈深慨然有普救生靈之志嘗言能忍者有裨於道好殺者必喪其元遂與父散游四方隨時化度云嗚呼可謂女仙中英雄矣

余氏父女傳

東南之地多仙才而可與點化之訣者惟沈家眷屬余十舍者萬山之婿也少好施與萬山以幼女妻之並傳以丹砂妙道豐